

Fasnacht 2021



Es goot schlächt iber Corona ebbis z'bringe
wenn'y d'Värs no mit em Mundschutz sotti singe
und iberhaupt deent's gar nit so guet
wemme no dr dopplet Zyyleabstand yhalte duet.

Drum sing y jetz ohni dä Gaiferlumpe my Bangg
und ohni Zyyleabstand, y bi jo nit grangg
denn y ha hitt äxtra no im Bruune Mutz
mi sälber teschtet mit 3 Zwaier und 4 Kaffi Luz.

S'isch zwor e'n'Alte, aber s'lohnt sich zem's erwähne
dr Trump isch nimmi am Rueder z'Amerika äne
aber statt jetz e Junge, Dynamische und Xunde
hänn d'Archäologe bim grabe no dä Grufty gfunde.

D'Ackermaa isch abgwählt und dr Wessels het dr Huet gno
und dä frisch Wind het im Rothuus sicher guet do
eso isch in dr Regierig wieder Alles perfäggt
und niemer schwätzt me dä Sangt Galler Dialäggt.

Am Banggschalter hett mi dä dutzt, dasch e Glatte
und sait «give me fife», im Tschyyns-Jäggli ohni Grawatte
denn hett er no Turnschlappe an syne Flangge
no hani gwartet bis er no sait: hesch mer 2 Frangge.

My Bärg WC-Papier hett mi zem Origami inspiriert
no hani mit däm Papierfalte gladdi Figürli kreiert
kirzlig hani e ganz grossi Figur gestaltet
y ha s'Auti originell am'e'ne Baum zämme gfaltet.

Ych ha die Covid 19 App au installiert
denn hänn's chaotisch mit SMS reagiert
ych sey negativ, aber y sell my entschlagge
ych haig statt Covid, 19 Biibeli uff dr Fudibagge.

Do bättlet mi sone Bättler aa vor em Schlüssel
au vor em Globus hebt mer ain s'Bächerli vor e Rissel
und vor em Schluuch macht nomol ain die hooli Hand
nur dä hani kennt, s'isch dr Finanzscheff gsi vo Baselland.

Nach em Abläbe kemme's dails uff em Hörnli in d'Ärde
und anderi wänn lieber uff em Wolf beärdigt würde
dr Wessels kunnt aber emol, ass grieni Ikone
in e Parkfäld vo sine uffghobene blaue Zone
denn ringsum no e scheen begrients Gländer
und statt e Grabstai druff, e Veloständer.

Zem Schluss mecht ych das doch no erwähne
me sott ohni Masgge nit hueschte, niesse oder gäane
e herrlig aagnähmi Infizierig isch jedoch garantiert
wenn me dr Fasnachts-Virus zimpftig inhaliert.

www.bäffzgi.ch

Wottsch au by uns bänggle?

Uff www.vsgbasel.ch erfahrsch meh!



1906